



Grupo Provincial Socialista

Rúa Progreso, 32 – 2º andar
32003 Ourense
Tlf. 988 385 203 Tlf/Fax. 988 385 178
CIF: G32244345

ELVIRA LAMA FERNÁNDEZ, deputada e voceira do Grupo Provincial Socialista da Deputación de Ourense, en base ó previsto na Lei de Bases Reguladora do Réxime Local, ó artigo 91 e 97, entre outros, do R.O.F. e o Regulamento da Corporación presenta unha **MOCIÓN SOBRE A RETIRADA DE HONRAS, CONDECORACIÓNS E RECOÑECEMENTOS A PERSOAS CONDENADAS POR SENTENZA FIRME**

EXPOSICIÓN DE MOTIVOS

O Consello de Europa aprobou hai dúas décadas o código de conduta para a integridade política dos representantes locais e rexionais electos. O documento salienta que “o respecto polo mandato do electorado vai estreitamente unido ó respecto dunhas normas éticas”; subliña que as normas de conduta implican “uns imperativos éticos que deben ser respectados”; e resalta que “o conxunto da sociedade debe participar na restauración dun clima de confianza” nas institucións.

Ese código determina que todos os representantes públicos deberán desempeñar o cargo con arranxo á lei. No desempeño das súas funcións, insiste, “deberán servir ó interese público e non exclusivamente ao seu interese persoal, xa sexa directo ou indirecto, ou ó interese privado de persoas ou grupos co fin de obter un beneficio persoal directo ou indirecto”. A conferencia de ministros europeos responsables das institucións locais e rexionais insistiu nesta mesma dirección coa declaración sobre participación democrática e ética pública a nivel local e rexional.

Neste mesmo sentido, a Deputación Provincial de Ourense aprobou no pleno do 30 de abril de 2014 o seu propio código ético e de conduta, o primeiro do seu tipo, publicitou daquela o goberno provincial. Ese código ten como obxectivo “regular as normas éticas de referencia” para os cargos electos e o persoal ó servizo da administración, e procurar un “comportamento profesional, ético e responsable, contribuíndo a reforzar a calidade democrática e a rexeneración do sistema institucional”. En definitiva, trátase dun código que busca a implantación dunhas normas éticas comúns que permitan a normalización das boas prácticas e a mellora da imaxe pública.

Este regulamento provincial actualmente vixente, certifica que os casos de mala xestión e corrupción “degradan e prexudican á democracia e danan a credibilidade de institucións, políticos e empregados públicos”. Incluso indica o camiño a seguir ante estas preocupantes situacións: “Fronte a estes fenómenos a única resposta posible é a de comprometerse co bo funcionamento da democracia local e profundar nela a través dunha conduta honesta, transparente e aberta á participación”.

www.psdegpsodepourense.es
socialistaourense@gmail.com

Facebook: PSdeGdeOurense

Twitter: @PSdeGDepOU





Grupo Provincial Socialista

Rúa Progreso, 32 – 2º andar
32003 Ourense
Tlf. 988 385 203 Tlf/Fax. 988 385 178
CIF: G32244345

O PSdeG-PSOE cre que chegou o momento de, efectivamente, comprometerse e afondar na defensa da honorabilidade desta institución, tal e como sinala este regulamento, con accións concretas. De feito, o código indica que será a referencia de conduta a seguir para todas as persoas que forman parte da Deputación ourensá porque “ao ser o espello no que se mira a cidadanía, deben eludir calquera acción ou omisión que poida prexudicar nin sequera minimamente a imaxe institucional da Deputación e minar a confianza dá cidadanía na institución”.

Os recoñecementos en forma de obxectos, denominacións de espazos e lugares públicos, ou honras a persoas condenadas en firme por delitos contra a Administración Pública, de corrupción, e outros tipos penais, nos espazos e lugares da Deputación Provincial e das entidades locais, impiden ser referencia ética pública e minan profundamente a confianza nas institucións. A súa permanencia no tempo logo da sentenza xudicial firme condenatoria, indubidablemente supón incorrir en “omisións” que prexudican a imaxe institucional, contravindo ó propio código ético da Deputación e á regulación aprobada polo Consello de Europa.

Ademais, o mantemento destes recoñecementos choca frontalmente contra principios que os cargos públicos da Deputación ourensá “desenvolverán activamente” na súa acción, entre outros, “non deberán conducir a súa conduta de tal modo que poida prexudicar a imaxe ante a cidadanía ou a afectar a súa reputación institucional”, segundo o código ético. Resulta obvio que unha condena, por exemplo, por prevaricación continuada que supón un obvio menoscabo dos intereses e recursos públicos, e da imaxe das institucións, prexudica á imaxe das institucións estando o autor ou autora do delito, tanto de corpo presente como de corpo ausente en forma de recoñecemento honorífico.

Así pois e seguindo o exemplo doutras normativas e institucións españolas e europeas que, nos seus regulamentos recollen expresamente que, se garantirá que os recoñecementos honoríficos ou conmemorativos recaian só en persoas dun compromiso público relevante, que en ningún caso fosen condenadas penalmente por sentenza firme, o PSdeG-PSOE considera que esta deputación debe poñerse á cabeza de Galicia na defensa da ética pública e no compromiso da defensa activa da honorabilidade da política e das institucións.

Polo exposto, o Grupo Socialista presenta as seguintes **PROPOSTAS DE ACORDO:**

1. Desposuír de honras, condecoracións e recoñecementos ós concelleiros, concelleiras, deputados, deputadas, e presidentes e presidentas das entidades locais e da corporación da Deputación Provincial, que fosen condenados mediante sentenza firme por delitos contra a Administración Pública, corrupción ou outros tipos delictivos recollidos no Código Penal.





Grupo Provincial Socialista

Rúa Progreso, 32 – 2º andar

32003 Ourense

Tlf. 988 385 203 Tlf/Fax. 988 385 178

CIF: G32244345

2. Retirar calquera símbolo, placa, cadro, busto, estatua; denominación de vía, espazo, lugar, celebración ou evento público; e calquera outro elemento, obxecto ou denominación de carácter análogo ós detallados, que supoñan recoñecementos honoríficos ou conmemorativos a deputados, deputadas, presidentes e presidentas da Deputación Provincial, que fosen condenados mediante sentenza firme por delitos contra a Administración Pública, corrupción ou outros tipos delictivos recollidos no Código Penal.
3. Instar ás corporacións locais da provincia de Ourense á retirada de calquera símbolo, placa, cadro, busto, estatua; denominación de vía, espazo, lugar, celebración ou evento público; e calquera outro elemento, obxecto ou denominación de carácter análogo ós detallados, que supoñan recoñecementos honoríficos ou conmemorativos a concelleiros, concelleiras, deputados, deputadas, presidentes e presidentas da Deputación Provincial ou das corporacións locais, que fosen condenados mediante sentenza firme por delitos contra a Administración Pública, corrupción ou outros tipos delictivos recollidos no Código Penal.

En Ourense, a 8 de febreiro de 2019

Asinado: Elvira Lama Fernández



SR. PRESIDENTE DA DEPUTACIÓN PROVINCIAL DE OURENSE

www.psdegpsoddepourense.es

socialistaourense@gmail.com

Facebook: PSdeGdeOurense

Twitter: @PSdeGDepOU